


# Jekabaara



Cikela ceman n'a musoman kunnafoniseben

a be bo kalo o kalo

Jamana baarada la BP: 2043 Bamako (Mali)

d. 20

Boke 110 nan  
1994 SAN - DESANBURUKALO

## AN K'AN KA SIRAW LABEN. SANNIFEERE WAATI SERA.

### Dakun w

Ne 2: Jekabaara ye dibi fara ka  
bo cikelaw kunna.

Ne 3-4: 1994-1995 san  
sannifeere taabotow.

Ne 5: - Saya te jen to.

Ne 6: Nolobugudugu sigicogo.

Ne 7: An ka kanw joyc  
kunnafoniko la.

Ne 8: Mun bëna ni faatmusow  
ka konotaba ye?

Ne 9: Lönönka tanko njogniajeba.

Ne 10: An ka yele doonin.

Ne 11: Cikelaw n'u fanga.

Ne 12: Mali ntolatanko  
sannayéen na.



### Kalo laadilikan

An k'an taasi doonin  
maabakumaw kan.

- Sanni i k'a fo ko n faso ye mun ke  
n ye, a fo ko n ye mun de ne n faso  
ye folo, ka masoro fen were te  
jamana bolo jamanadenw ka baara  
ko, a be min nafa tila u ni njogon ce.

Jonni F. Kennedy  
Lameriken jamana peresidan  
ko 1963 san


- Faso ye koori de ye. A b'a denw  
masiri n'a y'a soro olu y'a ladon ka  
ne!

Platon

Gereki jamana kodonnaba do  
Bamananfanga sariya te doewere  
ye, adamadenw benmafanga ko,  
min b'u nangi n'u ye sira bila,  
walima k'u lawasa n'u b'u josira  
kan!

Daa Monzon Jara  
Segu masake do

"Daniya numan ni Kumamugu in si te jamana nafa, fo kelen : WALEYA" (Abdulayi Bari)



Yakuba Jara

Tizana, kalo 11 nantile 5, 1994 san oli ni barikada ani wale numandon ka jo Tizana "AV" sekretéri Yakuba Jara yé, ka jésin Jekabaara n'a baarake bagaw ma;

Jekabaara, i kera tile ni kalo de ye anw bolo. Dugu mana je, anw be i tile falento ye ni falencogo ce ni ye. Su mana ko, anw b'i kalo falento ye ni falencogo ce ni ye. Jekabaara, i kera lanpanmene de ye bon kono. Lanpanmene min nooro ka bon kosebe. Lanpanmene min te sa abada! Jekabaara, anw ka kan k'i walenumandon. I nana tuma min na, "CMBT" pemogow tun be anw laje torow kono, ka cikecogo kuraw fo anw ye; ka kalanw ke dugumogow kun. Dow tun be da ala, dow tun te da a la. Jekabaara, i nana ke sababu ye anw be o cikecogo kuraw kalan tuma min, n'an nana ka bo forow kono k'an ko k'an je. Jekabaara daamu be i kalan na. N'an ma don balikukan na, anw be ke an yerema jugu ye. Jekabaara anw ka kan k'i walenumandon. Anw tun te jamana ka nefetaa kalama. Nka, e de kera sababu ye, ni burama kulubali ni Modi Sumano ka bamananka foli bolen ko yen, arajo

Mali la, anw ka se ka kunnafoni soro dije fan tan ni naani taacogow la. Jekabaara i kera kalamene de ye anw ye, kalamene min te sa, Jekabaara, anw ye dijelatige diya don e de fe. An mana an new fili kofe, an be dije bees ye : farafinna ni farajeja. Jekabaara ni dije kera "di" walima "li" dunta ye, anw b'a dun e de fe. Jekabaara n'anw ka jininkali tun sera i ma, anw tun be ijininka munna ima sekana waatila, waati min n'an benbow i n'a fo "Daamonsen Jara, Babenba Tarawele, Jose Male Mena, Sungalo Bengali NGolonbugu, Mpiye Buware, Nijiana; Kubá Guwale Tizana, Samori Ture, Elihaji Umaru", u ka ca. Olu tun b'a fe ka farafinna kunkorota.

Nka, n'i y'a ye anw m'i jininka, anw y'a don ka fo ko i tun be waati min makonona o ye nin waati de ye. Waati min ni jemogow haminen don n'u balimaw ye. U balima minw ni faso jo te se ka ke u ko abada!

Jekabaara anw ka walenumandon beka taa i ma. Anw ka walenumandon beka taga i ma cogo min na, anw ka foli ni barikada be taa mogow ma o cogo kelen na, mogo minw ye kongo muun, ka minnogo muun, ka sunogobaliyata, kataa ekognosense, k'i lase anw ma. Jekabaara i nana waati la, waati min ni minnogo tun b'anw na ka se k'anw fasokan



sebennen don. Nka i nalen ye o minnogo nogoya. Anw be dugaw ke a kolon kana ja abada. Jekabaara lakalitasében tow nafa ye kelen de ye, u kalanbagaw ma. Nka e ta nafa ye "3" saba ye. Anw be dije bees kunnafoni soro e de fe. Anw b'an ka baaraw kunnafoniw soro e de fe. An be bana jugu furakecogo don e de fe. Jekabaara, i donbaliya ye bana furakebali de ye. E donni ye kenya banbali de ye. Jekabaara : jigi tigelen jigi tugunbaga; desebagatow lajenajebaga; yatimew ladibaga; falatow ladonbaga. Tubabukantagara k'anw to; larabukan tagara kanw to. Anw tun jigitigera dijeso sigi kecogo numanna. Bawoanwma tubabukan soro, anw ma larabukan soro nka e de nana anw jigi tugu dijeso sigi kecogo numanna. Jekabaara idawula ka bon, i nooro ka bon. Malidenw jigi daamu be i kalan na. Jekabaara anw b'i fo k'i walenumandon.


Nibatakibora ne Yakuba Jara yé, Tizana "AV" sekretéri don. Nka foli beka taa Dotège Sakoma. K'a ni faso baara. Aye min fo Miseli Dawo kan, a ma foyi fo ni tije te. Ala ka a sara. A Sakó ! Nka foli be Saliya Keyita ye Jaboso ani Gawusu Keyita Somina. N ma jinen Dirisa Bengali ko Ngolonbugu ani Yakuba ni Lamusa Bengali. N b'a jira Lamusa la k'a ko mogoninfin te fosi ye i dakan ko. Nka mogo bangeyoro fana de be i bila "eretari" la. Nka Ala kana anw ka dabali tigelen tije abada. Ninsago jugu sago. Ala kanw sago d'anw ma.

Yakuba Jara  
sekretéri, "AV" Tizana  
ZAER Kangoni sekiteri Beleko

*Boko nata kono, aw bema  
kunnafoni soro Welesebugu  
Otiwale cikekafo kan.*

# 1994/95 san sannifeere taabolow

## Sannifeere suguw laben-cogo koori la



Zan Dosayi Jara

Ka da siraw ni koorisuguwtipecogo juguya kan sanji fe ninan, a nininen be senekelaw fe, u ka MAKOCI demen kosebe siradilan na.

Dugu o dugu sira ma dilan, kooricemobili tēna se yen. Donda fila be ke koorkuruw la, minnu koori be ce "militi-benniw" fe.

### koorisugukura sigiliyamaruyacogo

- An k'a ninia ka do bokorisugukura sigi la.
- MAKOCI ka mara 5 kono, ni koordugu kura ma ne sigili ko, a k'a soro dugu koori be taa :

Fana : tōni 30

Buguni : tōni 25

Sikaso : tōni 30

Kucala : tōni 50

San : tōni 30

### Dafu ta

Kabini ɔkutoburukalo la, MAKOCI ka cikelakolidenw ka kan ka nōgonye ke dasenendugu bēla, dafu sannifeere labenni kanma. Kunnafoniw be boli :

- Dafu sanyoroko
- Sannifeere kedon

- Dafu sannen marayoroko
- Ka marayorō nini Jene ni Saro senekeminew la.

Dafu sansugu man kan ka dēse tōni 2 la.

Walasa kamiyon fa ka soro yoro kelen, dafu sannenw be fara nōgon kan ni wotorow ye.

koori-san-jekuluw ka kan ka dafu san u bolo fe.

Duguyiriwatōn ka kan k'u ka dugumogow ka dafu san.

### Sannifeere damine n'a labandon

Sannifeere be wuli 1994 san nowanburukalotile 1; a be kuncé 1995 san zuwenkalo tile 10.

### Mobili lafali sara

Akera sannikefen suguya osuguya ye, d. 25 tōni nan

Duguyiriwatōn gansanw ka sugulabaara sara

O be ben d. 500 ma, walima dafu tōni kelen o tōni kelen

Dugu yiriwatōn minnu be kafoyiriwatōn kono.

Olu ka sugulabaara sara be ben d. 750 ma koori walima dafu tōni kelen o tōni kelen;

### Sannifew songo

Dafu ne folo, d. 25/kilo

ne filannan, d. 18/kilo

ne sabanan, d. 11/kilo



Iziniw be baara ke Mali koori lasabatili siratege de la

### Duguw ka koori kolosili sara

- Tile o tile d. 25, min jate te tali ke koori ceta hake kan.

- koori kolosili wari te sara duguyiriwatōn ye.

### Sugulabaara sara

Akera sannikefen suguya fen o fen ye, osugulabaara sara be ben d. 5 ani tama 3 de ma tōni na.

### Koori : ne folo, d. 25/kilo

ne filannan, d. 21/kilo

ne sabanan, d. 18/kilo

Tiga : songo kelen te tiga la, nka MAKOCI k'ale b'a san kilo d. 10

Siw: siw sansonge senekelaw bolo:

koori "Gu" ni "R1" d. 40/kilo

kaba : d. 13/kilo

so : d. 25/kilo

Malo : d. 26/kilo

Tiga : d. 20/kilo  
 Doliki : d. 50/kilo  
 Bené : d. 25/kilo

Koɔri lajeli MAKOCI ka sannike jekulu fe

Koɔri lajeli ni "buwati sitandari" ye, o wajibiyalen don koɔri filela bée ma.

A wajibiyalen don koɔri filelaw bée ma, u ka baara ke ni "Kilaseri" ka buwati sitandari labennen ye.

MAKOCI ka sannike jekulu nemaak ka kan ka koɔrisugu lamini ke, walasa ka koɔri lajela somi da koɔri nejugu kan;

Koɔri boli manaborew la, o dagalen te.

Duguyiriwatōn la koɔri lajeli  
 Duguyiriwatōn mogowyerew b'u ka koɔri koloma suguya dantige

Duguyiriwatōn ni cikela minnu be taa pɔnbasikili, olu ka koɔri be sara u ye MAKOCI fe, tuma min n'u ka koɔri katite dantigera "kilaseri" fe;

Walasa duguyiriwatōn ni pɔnnataalaw k'u bolo yelema ka ne koɔri kalite dantigeli la, tile 10 o tile 10 MAKOCI béná kunnafoni di u ka koɔri wurusilen kalite kan.

Laben ka kan ka ke kilaserisow kono, min béná segesegeli nəgoya.

Jekulu sigililen be koɔri lajeli fɔnɔgɔnkɔlatemennikanma. Omogow ye cike yiriwabolofara ani Dabalida mogominnu be MAKOCI marawla, ka fara "Sikowu" ciden kan; baaraw be latige kilaseri ni senekelaw yere nena.


Dafu kalite dantigeli

Ne foɔ:

- A kundama te dese m 1,50 ma;
- A sanuyalen don,
- A fu ka je,
- A ka magan, fen were nagaminen t'a la.

Ne filanan :

- Janya : a kundama cayalen ye m 1,50 ye, a deselen ye m 1,20.
- A ka maganya be hake ro
- fen were min nagaminnen a la o man ca



*Duguw siraw ka dilan walasa ka taa-ni-ka-segin nəgoya  
 koɔri donnī mobiliw bolo.*

Ne sabanan ::

- Akundama ka surun nim 1,20 ye,
- A fu ka bilen,
- A kolo man gelen kosebe.

Kolɔsili

- An kana da jukunkurun san, o ka kan ka bo dakala la a tige tuma. Da kunkurun n'a diliw be se ka toli u danma.

- An kana dafu mara tile la.
- An ka dafu kolosi tasuma la, fen were kana soro dafu siriw ni nəgon ce.

Dafu sɔsoli

- Dafu kuru bée kelen-kelen be foni sann'u ka don sɔsɔlikelan na.
- An be dafu yuguyugu kosebe.
- An kana dafubo ni dafu numan nagami nəgɔnna. Dafubow be k'u danma balɔn ye.
- ni sanji kera nafen ye, an be dafukuruw ni dafu balɔnw yereke walasa fine ka don u fe.

Sanniekulu ka baara taabolo

- Yelemani ma don sannifeeresebenw la.
- Sanni sannifeere wulili ce, nowanburukalo tile 10, senekela minnu b'a fe ka taa pɔnbasikili la, olu togo ani duguyiriwatōn ka tile 10 o tile 10 sanni kecogo kunnafoniw ka kan ka se cikemara nəmaaw ma.
- A dagalen te, ni senekela min ka soro te toni 10 bo, o ka koɔri ka taa pɔnbasikili la.

Koɔriceli(nefolikera Jekabaara boko

107 nan)

Hakiliwigin na :

N'a be ne, ka do fara senekelaw kan minnu be taa Pɔnbasikili la, nka kamiyon te taa koɔri ce mogɔ si ka foro la.

- Ni sugu min koɔri celi daminena, o ka kan ka laban sanni dɔwɛre damine ce.

- Duguyiriwatōnka kanka mobiliw kunnafonisebenw bée lafa, i n'a fo MAKOCI ka sannike jekulu b'a ke cogo min.

- A dagalen te, fen were ka ye koɔri la, min t'a do ye.

Duguyiriwatōn ka koɔri wari sarali

- Nəbila sarali t'a la.

- bilakasuma doɔnin t'a sarali la.

Kafojiginewni Bankiwka koɔri-wari-sara

Walasa ka do bo musakaw la ani tanamako wərew, kafojiginew ni Bankiw béná ke koɔri caman sanbagaw ye.

Juru sara

Juru caman ka kan ka sara sannifeere kufɔlɔ la.

Duguyiriwatōn ka juruw be tige a sunna.

An k'a to an hakili la ko :

- Cikela caman k'u ye geleya soro "G17" seneni la, ka da a soro dogoya kan tari la. Nka, bée b'a dɔn ko. "GL7" koɔribu ka ca, wa a ne sanuyalen don

fana, a dunni te fen ke adamaden walima baganw la. O la, an ka kan ka nejini ke geléya fólenw na, ka soro ka "GL7" senené bila bolo kelen kan;


- Nejinini ka kan ka ke iziniw minen misenkow la, walasa ka koori wurusili nogoya. O la, yelemba ka kan ka don MAKOCI ka minen san kecogow la.

- Mibili bolisiraw tijeni be ka geléyaba don koori wurusili la ka taa a fe. A jininé be kooribaara bolofara mogo bee fe, u k'u seko damayira ke sira dilan na.

A yera k'a fo ko caman farala Mali ka koori dawula kan kabini "isa 205" senené dabilara. O ye waleya ye min ka kan ka sinsin.

MAKOCI kuntigiba y'a jira ko jinan sankoori sorota ka ca fo ka damatemén. Nka an b'a don fana, ko ni koori in bee sera ka wurusí konuman, o b'na nafaba lase jamana kono. O la, a y'a jini koori baarakelaw fe :

- bee k'i cesiri baara fe, k'a ta birakonomogo, walimaizini-kono-mogo, foka taa se cikslakoliden ni senekelaw



*Sannifeere kekonuman te taa ben k'o dugudenw ce.*

yere ma;

- baaradakuntigi kelen o kelen ka kan k'a janto a ka baaradenw la,
- geléya si kana soro neamasoba walima maraw kono.
- bee ka wili k'i jo jinan sannifeere ka se ka ke here ni daamu na.

- senekaw ka son siraw dilanni ma, k'u ka koori bo ka ne foro kono, ani ka kamyon lafa u lafagacogo numan na.

Zan Dosayi Jara  
MAKOCI ciekuntigi dankan

## A ye n demen n ka ko la

Cekoroba do ko: k'a ben'a denmuso furu ne ma, k'a denmuso in furu wari ye dorome 3 ye. Nk'a yere de bena denmuso in furu wari di ne ma. N be soro k'a lasegin a ma. A ko ne ma k'a ka wari bilalen be banki la, n ka taa o ta kana wari in sara. Nk'a dogoke ce 6 jolen be banki sira la yen. I kana dan dorome 3 in doron ma bawo n dogoke 6 minnu be sirakunna i ne yen n'i sera mogofoloma, waari min b'i bolo i b'o tila mogofila ni nogon ce. A si ta kana caya ni si ta ye. Wa dorome kelen kana to kerefe, n'i sera ni hake min ye mogofilanma, i b'o fana tila nin cogo la fo k'a 6 bee ban, dorome kana don ninnu si nii yere ce. I ka wari in tila mogofila ce, i ka dorome 3 di o ma ka taa dorome 3 to di cekoroba ma, a denmuso furu wari ye. Ko nin mogofila min sera k'a don, i ka kan ka taa wari hake min ta banki la ko denmuso in be furu o tigi ma. Ne

balima Jekabaara kanubagaw, n b'a jini aw fe, aw ka jateminé ke i ka kan ka taa waari hake min ta banki la, aw k'o hake jini k'o fo Jekabaara na ta kono.

Sumayila Fonba, sekretéri  
Zayeri jogo Sekiteri Joyila

Lakolosili: Sumayila Fonba, e ye lada wuli de. N'i ye jinikali ke Jekabaara kalanbagaw la, i.b'a jaabi fana bila ka na. Anw b'o bila an bolokoro. Ni mogow y'i jaabi an b'olu ka jaabi n'i ta sanga nogon ma. Ni mogow dun ma se k'i jaabi dun, an b'i ka jaabi labo walasa ka


## Saya te jón to

Ne Mamadu Dunbiya be bataki in ci MAKOCI baarakelaw bee ma Abuduli kafaatulikoran. Abuduli ka faatuliy'anw miiriyoro janya. Abuduli n'anw ye baara ke nogon fe san caman kono. A m'anw jigitige; a m'anw dusukasi; a m'a jira anw la k'a ka fisa n'anw ye. A m'a jira anw la k'a joyoro ka bon n'anw ta ye. A m'a jira anw la k'a kalannen don n'anw ye. Abuduli tun t'a yere fisaya mogofila. A tun t'a yere bonye mogofila ma. I nako

jugu fara i nako juman kan, a tun b'i kunben ni nisondiya ye. Ni saya tun be jón to, saya tun na Abuduli to. Bawo, Abuduli tun be mogofila sira juman kan, ka hakilinan juman d'i ma. Ne te se k'a juman bee fo ka ban. Ala, n be dugaw ke Abuduli ye. Ala ka yafa k'a ma; Ala k'a dayoro sumaya. Ala k'a fara lahara jón kunnandiw kan, cibaa kanu koson. Nka foli be MAKOCI mogow bee ye ani Jekabaara kalanbagwa bee.

Mamadu Dunbiya  
Ncobugu AV sekretéri  
Fana MAKOCI mara

## ŋolonebugu dugu sigicogo



Yakuba Bangali

ŋolonebugu ye dugu ye min sigi ni bi ce be taa san caman na. Mogo folo min ye dugu tu tige, o togo ye ko ŋolone. Amogo folow bora dumanaba, n'o be kijan mara la. Folo dosonya senfe, unana sigiyoro in na. Nka dugu daw fana bora ŋolonebugu, n'o ye Negebugu, Walasa, Nangola. Olubee bora dugu in kono. Dugutigi minnu temenna, o ye 17 ou 18 ye ŋolone,

## Sinafodon 6

Folo, don 6 de tun ye sinafodon ka ko bee ye. U ka baara bee fana de be boloda donw cogo koson.

O don wooro togo:

Fahama; Sana; Wali; Ncibi; Sama; Toro; o don kerekerenerenw de tun be ke ka san jate bo, min ye sanyelema jenajew yen'an k'oma kopori. Pori ye jenajew ye min be ke san o san, ka ber waati kelen ma. Pori ye dugu sigibaa ka sanga de ye. O de y'a koro ye. Ni dugu tu tigebaa faatura ka ben u ka sinafodon min ma, pori de be ke ka ben o don kelen ma san kono. O de koson pori daw be damine alamisa, daw be damine juma, daw be damine

nolo, Yapego, Kajana Kawa, Kalaki, Wutana, Wuto, Saagine: ŋolosun, Fance, Nakaja, Fanyegé, Cekori, Nanfomo, Fabine, Dugutigi. Ale de be dugu kunna bi, u dugutigiw bee jamu ye Bangali ye.

ŋolonebugu ni dugum inw be danbo olu ye :

Dogoni, o be koroñfe, Ncabugula, tilebin fe, a ni Wakoro be danbo. A ni Jomaten be danbo, a ni Kamenebugu be danbo, a ni Nangola be danbo. Anw ka dugutigiya be falen-falen du naani ni ŋogon ce.

Ladalá kokoro caman b'anw fe.

Folikan

*N be foli ke folo Jekabaara baarakelaw bee ye. Ka foli ke anw ka kafoiyiriwatɔn kuntigi, ye n'o ye Zanga Sogoba n'a muso Saran ye.*

*Ka foli ke zayeri seketeriw bee ye.*

*Ka foli ke ŋolonebugu dugutigi n'a dugudenw ye. Yakuba Bangali, ŋolonebugu*

Yakuba Bangali ka bo  
ŋolonebugu Zayeri dogoni  
Seketeri Kijan

nten, daw be damine araba. Pori be damine wulafe. Misiw, sagaw, baw ni se caman be faga. Sodenwfana be na ni malo ni sew ye, dunaw caman be na, terisira ani furusiraw fe. Jenajew be damine suf fe ka dugu je. Tilefe u be taa dugutigi folo ka kaburu son ni se ani wooro ye, ka fara dunu ni bala kan jenajew be to senne fo tile naani. Kokorow bee be ye kene kan. Ne b'a jini sinafodiminsenw bee fe ukan'a to anw ka kokorow si ka tunu.

Ne be foli ke sinafodiminsenw be ye, u kanw dege sinafokan na. N be foli ke kijan seketeri kuntigi Ceman Danbele ye, ka foli ke seketeri zayeri kuntigi 10 bee ye.

Yakuba Bangali  
Golonebugu Kafoiyiriwatɔn

## Wele jaabisəben


Tumani Yalam Sidibe, ne Yakuba Kulibali kumakan don ka bo kumiri. Ne y'o dugu balikukalan karamoko filanai de ye. Ne be bataki inciaawma k'i ka welekan jaabi. E ye baara min ke cikclaw ye ni dije kunnafoni dili y'u ma, o diyara anw ye kosebe. Ne Yakuba ni minnu ye kalan ke ŋogon fe, ne b'a fe olu bee ka Tumani Yalam jaabi a ka baarañonya juman jinini welekan na; "Ke mogo fe min b'i fe". Tumani Sidibe be cikclaw fe, an fana ka k'a fe. Anw bee b'i jaabi Tumani yalam Sidibe

U togow file nin ye :

1. Solomani Kulibali ka bo Jona
2. Lasina kone ka bo Welesebugu
3. Sedu Sise ka bo Sinsinna
4. Saliya Trawele ka bo Biledo
5. Bakari Fane ka bo Sungolo
6. Solomani Trawele ka bo Panata
7. Yusu Kulibali ka bo ŋotina
8. Sumana Kulibali ka bo Zantona
9. Miseli Kone ka bo Fineso
10. Madu Trawele ka bo Finsankoro
11. Karamoko Trawele ka bo Baso
12. Bamusa Trawele ka bo ŋoloinaso
13. Birema Trawele ka bo San
14. Sibiri Sanogo ka bo Koloto
15. Aliyi Kone ka bo Namanaaso
16. Baba Male ka bo Namanaaso
17. Daneli Sogoba ka bo Gogobugu
18. Dawuda Kulibali ka bo Fenkoloni
19. Amadu Danbele ka bo Jocna
20. Sanba Sango ka bo Zena
21. Alu Male ka bo Zena
22. Dawuda Jalo ka bo Jitanna
23. Kalifa Sanogo ka bo Gosikala
24. Lasina Kulibali ka bo Baraban
25. Amadu Danbele ka bo Sikineso
26. Yakuba Kulibali ka bo Toro
27. Sumana Fomba ka bo ŋolobugu
28. Saliya Kone ka bo Jitanna
29. Saka Dawu ka bo Sedubugu
30. Gawusu Kulibali ka bo

Sanankorobugu

31. Dara Danbele ka bɔ Nanposila
32. Nunuke Berté ka bɔ Kadubalan
33. Umeké Koné ka bɔ Su
34. Saliya Koné ka bɔ Sisumana
35. Kalifa Jabate ka bɔ Sigineso
36. Keletigi Sanogo ka bɔ Zakorola
37. Mamutu Fonba ka bɔ Goloninaso
38. Sidiki Kulibali ka bɔ Nikilan
39. Kasimu Danbele ka bɔ Famusaso
40. Bakari Danbele ka bɔ Nanaso
41. Amadu Trawele ka bɔ Kumiri



*Yakuba Kulibali*

42. Sumana kulibali ka bɔ Kumiri
43. Umaru Trawele ka bɔ Kumiri
44. Adu Jalo ka bɔ Kumiri
45. Ne Yakuba Kulibali ka bɔ Kumiri

Ne Yakuba b'a nini bée la jelen fə an ka Tumani Yalam Sidibe ka welejaabi, n'o ye batakiw cili ye Jekabaara ma an kunkow kan, an ka duguw kan an'an haminankow kan. An k'a ka welejaabika d'aka wale juman kelen kan ciklaw ni monnikelaw ye ani baganmaralaw. Tumani ye an bée bo kunpan na dijé kónokow la. Ala ka Tumani demen a ka baara la.

Tumani ye Mali goferenaman kunnafonidianma. Ala ka Malidemén. Ala ka sababu juman ke Mali jamanaden bée ye. An ka dugutigi juman b'i fo Tumani. O ye Musa Trawele ye. Kumirikaw bée b'i fo i ka baara juman na. Kumiri ni kucala ce

ye kilometre 15 ye

#### **Yakuba Kulibali ka bɔ Kumbiri (Kucala)**

**Jaabi:** Yakuba Kulibali, ne ni jamana baarada mogobeejelen ka foli barikama b'i ye. I ye wele min bila nin ye ka jésin aw ka duguw balikukalankaramogow ma, o diyara anw bée ye.

An hakili la, u bée be welekan in jaabi ni batakiwcili y'an ma, jekabaara

kanma. Inice i ka baara juman in na. An ka foli b'aw ka dugutigi juman fana ye, n'o ye Musa Kulibali ye. Nin ye bataki jaabi ye an be min lase i ni mogotogofolenw bée ma. An hakili la, an n'aw bée kelen-kelen ka bataki soro an bolokoro.

**Tumani Yalam Sidibe  
Jekabaara kunnafonisében  
Jamana baarada, BP. 2043  
Bamako (Mali)**

#### **KA SE DUGUW MA**

## **An ka kanw joyoro kunnafoniko la**

91 san na tonjekuluw wulila ka Musa kele mun de kanma? Ka jamana ke jemufanga ye; ka fanga forobaya; k'a ke bée je ye. Ala y'an demen, Musa binna. Ako kera jemufanga min kanma o be ka sigi sen kan siratige caman na. Nemogo ka jama kunnafoni jamana kunkow la, o ye jemufanga taalan ye. Jama fanba dun te tubabukan men. Jamana ko bée dun jenabosira ye tubabukan in de ye halisa. O de koson ne tun b'a fe an k'an hakilinataw falen-falen kunnafonidi siratge kan.

A b'i, n'a fo fanga forobayali in jésinnen be tubabukan menbagaw doron de ma. Sabu kunnafoni minnu be jama kunkan, olu be lase tubakan dela folo yanni a ka lase an ka kanw na. Wa a bée te lase an ka kanw na yere. Jamana kunko minnu be lase tubabukan na ani minnu be lase an ka kanw na, n'an y'o fila sanga i be t'a soro tubabukan ka ca n'an ka kanw ye fo siye 10.

Sanbisaba ankajamana horonyalen ko, an marabaa koro de ka kan ye jamana marakan ye: o kan de ka fisa Mali kan 10 bée lajelen ye. Maa kalannen bée sonn'a ma ko tubabukan matarafabaaw te teme maa 20 kan kemé na.

An ka arajoso ninnu joyoro ka bon kosebe kunnafonidi la ka jésin an ka kan fobaaw ma. Nka halisa u to be ko. Sabu ni kibaru 100 dira tubabukan na,

kibaru 10 jégoen be tömo o la k'o fasari an ka kan na. An be yoro min i ko bi, jamana marabolo 8 bée ka kan n'a ka arajo ye.

Gawo arajoso ka Mali kunkakow jefokoroborow ye köröborikan na. Mocti arajoso ka fulaw kunnafoni fulakan na, nin ka bozow kunnafoni bozokan na. Tumutu arajoso ka surakaw kunnafoni surakakan na ani burudaamew kunnafoni burudamekan na. Maliden bée ka kan ni kunnafoni ye. Nemaaaw kana jama kunmuniya kunnafoni ma sabu u ka nemaaaya soro ni jama ka je de ye.

Cike kibaruya ni baganmara kibaruya ka fo an ka kanw na, o ka ni; o te doron ye, nka a kana dan o ma; jamana kibaru bée ka lase an ka kanw na i n'a fo a be ke tubabukan na cogo min. Jemu caman be ke an ka foroba arajo la tubabukan na, kasoro o tun be se ka fasari an ka kanw fana na. "Sinima" nafama dōw be boanka foroba tele la, olu tun be se ka fasari an ka kanw na. Aliman sinimaw fasarila fransikan na, an b'o caman ye an ka tele la yan. O siratge kelen na, Mali delila ka Sinuwa sinima do fasari bamanankan na, o kera kabini Modibo tile la. Mun na sinima sebew te sogin k'u fasari n'a jec ci be jama ye?

Arajo ni tele ye jama kalannan sebew de ye. U nogonna kalanso te. An **A to be ne 8 kan**

Le 7 nan to

k'an jija an ka arajow ni telew kana ke nenañlan dama ye. Balikukan bë se ka ke tele la; n'i y'a matarafa ko numan, san fila doron, i b'i ka kan kalan nin k'a seben ani ka jatew kecogo don. An kerefe jamana do kan, maa caman bora kalanbaliya la Ala ni tele y'a sababu ye. Kalan bolofara ka dogo min te se ka ke arajo wali tele la.

Anw ka tele be nenañje do ke ko "des chiffres et des lettres". (Jatedenw ni siginindenw) An ka kan si te desse k'o nogonna ke. Denmisén lamona kan minna, a be dönniya soro teliya lan'o kan de ye. Sangokalani nenañje mana doroko. Nemogow yere b'a fo ko a be farafinna bëe kalan siratege la.

Mogo do ko jemufanga ka taanjé be sanga kibarusebenw caya fe. O te anw ka jamana ko ye sabu Maliden fanba de te se ka o sebenw kalan. Anw ka jemufanga ka taanjé be soro anka kanw foli caya de fe arajow ni tele la. Nin yoroni na, an be folibila arajo Bamakan ma, sabu a cesirilen be kanko in na ka teme hali foroba arajo kan.

Wa kunnafoni nafama bëe, ani kalan bolofarabëe ka lase jama ma an ka kan na, arajow ni telew la. Kalan bolofara minnu be wele "Sciences physiques ni mathématiques ani philosophie ni biologie" (fenw-kono-dönni kalanw ni jateminekalanw ani adamadenya kalan ni fenw dabolo kalan), nin bëe labennen be an ka kan na ka ban.

Polotiki nemogow ka kan k'u yere wajibiya ka kuma jama fe jama ka kan na, o doron de b'u yamaruya urka taa kuma jama togo la. O siratege de la jamana sariyaw ni sariyabaju ni hadameden ka hake dantigelikan ka kan ka neso jama ye a be kan min faamu. A ka c'la ninnu nefolibaliya de kelen na ke ka wotebaaw dogoya fo ka n'a ke k'a te maa 30 bo kemé na.

Jamana minnu be se ka jate bi k'u taalen ne, olu si ka netaa ma sabati ni walikan ye; u bëe ka netaa jolen don yeredon kan. Wa salamu aleyikum.

Amadu Tanba Dunbiya

## Mun bëna ni faatomusow ka konataba ye?

Nafolotigiya, o ye adamaden bëe lajelen haminanko ye. Nka nafolotigiya cogoya dòw be yen, o be se ka ke sababu ye k'a ninibagaw lagosi.

An ka kuma koro do b'a fo ko mogo keneman mana je faatomuso fe, k'i be sa nafolotigiya la. N balimaw, nafolo be nini, w'a ka kan ka ninin fana. Ko dòw be ke nafolo nini kadara kono, adamaden man kan ka don o da fe. Nin kuma in mennen dòw fe, u be fen o fen na, u y'o dabila k'u ta to bëe lajelen ke faato nini ye. N'u m'a nini u yere ye, u b'a nini mogo werew ye. Faato te ko kalama, n'a negenna a tese k'a ban. Nk'a dusu kasilen don de ! N'i ye mogo caman nininka bi, u b'a fo ko faato be negen cogodi fo ka se ka je a fe. Faatognina ninnu b'a ke bawo sungurunbaya labennen be cogo o cogo, faato ninibagaw fana labennen don ten.

Nin wale jugu kebagaw tilalen don kulu belebele 2 de ye. Mogo minnu hakili la ko n'i jera faato fe, k'i be nafolo soro, ani mogo minnu be bila cidenya la. Cidenw ye kulu 3 ye:

- kulu folo be taga faatow nini ka na n'u ye. Ni mogo b'a fe ka sori, kulu 2nan b'a jira k'u be ka min miiri k'o te tine ye. Kulu 3nan be faatow minefanga yere la k'u ka finiw bo u la walasa kotigi b'a ka jeneya ke a feere ma bawo mogo te faato ka fa wuli tuma don. Ninnu ni faatow bëe lajelen ye kelen ye, u bëe ye faato ye. Nin mogo be sara u ka baara kelenw de la. Sara wari in cayara cogo o cogo mogo ka kan ka nigin o wari suguya la. Wa jama be yoro o yoro wale in te ke yen. A keyoro ye forokononaw, so kuraw (mogo te minnu kono folo) walima an ka suw dayoro, n'o ye kaburudow ye. Min be an ka tooro to juguya o ye an be mogo minnu bonje, k'u gasi sigi, k'u k'an ka mogo baw ye, k'anjigida u kan, olu de ka baara ye nin ye su fe, ka soro k'u yere fara mogo kenemanw kan tile fe. Garisegé mana bo nin denjuguya in na, den fa yeliko kuma t'a la. Yaalajuguw be damine bôlon kono fini faralenw be don, dòw

yere lankolon don. U be soro ka fini bo konobara in na k'a jira dije na ko nin ye kenebagato ka wale kelen ye. A m'u toro, bawo u yere ka miiri la, mogo minnu be nin kewale ninnu ke, olu faatow ka fis a n'o tigiy ye, wa su mana ko fana u ni muso tow bëe ye kelen ye.

Faatow Iakolosibaliya de kanma, mogo min mana s'u ma, u la soro te geleya kosebe.

Misaliw : Pene Wage ye gadonmuso ye, a sigilen be Darisalamu (Bamako) fosi t'a bolowa fa fana dönn'a denmuso la. Denmuso in ye den 3 soro san saba kono, denw fa, walima denw faw m'u yere jira don kelen. Wa denw be ka ladon makariko suguya bëe lajelen na. Ni muso min boyoro ma don jiginiyoro la walasa ka den lakana, dogotorow b'a bila denlamarayoro ka bolo kan. Cew b'u sinsin fen min kan, n'o ye k'a fo ko n'i ye faatomuso nini, k'i be nafolo soro, okuma in te tine yebawo an ma nafolitigi si ye k'o y'a ka nafolo soro faatognini señ fe. Anw fe yan Mali kono, san o san faatomuso do be den soro.

An kana se k'u demen, an kana se ka fosi yere k'u ye sa, nka an k'u n'u ka dusukasi to nogonna, k'u ka horonya t'u bolo.

Faatoden hake min wolola san danmado in kono, nikenyatigilamogow b'o kalama:

- 1980 san, den 10
- 1981 san, den 8
- 1982 san, den 2
- 1983 san, den 7
- 1984 san, den 3
- 1985 san, den 1
- 1986 san, den 2
- 1987 san, den 5
- 1988 san, den 4
- 1989 san, den 6
- 1990 san, den 8
- 1991 san, den 3
- 1992 san, den 7
- 1994 san, den 3

Sebenbaga : Umu Amar Trawele  
Bayelemabaga : Solomani Jalo

Nin bora le zeco (Les Echos) kunnafoni seben de folo kono tubabukan na

1994 san - Desanburukalo

# Лонон kalanko ногоналајеба

K'a ta okutoburukalo tile 24 na ka s'a tile 28 ma, ногоналајеба дo кera Лонон kubeda faaba kono. Lajeba in kuntun yekunnafonijensennaw joyoro pereperelatigeli de ye denmisew ka kalanko sinsinni na Лонон kubeda kono. Bees lajelen b'a kalama ko geleyaba be denmisew ka kalankola Mali jamana kono. Ni feere te se ka sorc ногонале Mali fan bees kalanko lasabatili la kelen ye, feere koni be se ka sorc u kelen-kelen na doonin-doonin. O yere de banbannen don ka masorad adamaden nafa ji be don ko la doonin-doonin de. Лонон ногоналајеба in sigira sen kan ni dije kalanko n'a seko an'a dонко баарадаба de ka demen ye, n'o ye "UNESCO" ye. Wale sifile baara in yere min bena sigi sen kan Лонон kubeda la, o musakaw be bo "UNESCO" de kun. A koni lawaleyali baaraw некун dilen don Mali denmisew ka kalanko setigiblon de ma.

Pereperelatigeli hukumu kono, an b'a jira aw la ko baara sifileta in be senna Afrika tilebinyanfan jamana duuru de kono. Olu ye: Mali ; Benen ; Senegali ; Burukina Faso ani Lagine.

**Ka kunnafoni jensennaw sendon kalanko sabatili la, o koro ye di?**

Kun min b'o la o de ye lafaamuya jemukanw ni lafaamuya sebenw laseli ye Лононкав ma, arajow ni kunnafonisraw ka bolo fe, minnu b'a to den bangebagaw b'a don ko kalan ye fenba ye an ka kan ka min di an denwma. Cemannin animusomannin bee ni kalan ka kan.

Kalan yere y'a danma nafafenba ye min be se ka kunce baarada kan, nka n'o t'a kekun ye. Kalan ye den ka josira do ye. Ur o belebele yere don. Ni den m'a sorc, n'a mogoyara a b'a bangebaaw jalaki. Odun be k'a jo ye. Nin bee de kanma, a ninina ko kunnafoni jensennaw ka kan k'ufanga fara kalankotigilamogowta kan walasa



Laje лемогоякане дo

bangebaaw b'a faamuya ko fosi te se ka k'u bolo ka d'u denw ma, min barika ka bon, min nafa ka bon ka temen kalan kan. Kalan nafantan te! Hali foro kono, cikela kalannen baara kecogo ka ni ni cikela kalanbali ta ye.

#### Лонон kalanko geleyabaw

Geleya caman be Лонон kalanko la. Nk'u ro kunbabaw ye an ka lada koro ye, kalansow yoro janyali kalandenw bara la; kalan minnentanya; kalan musaka botaw bangebaaw kun; diinew joyoro, fo ka se hakilinan jugu wrew ma npogotigiw ka kalanko kan, walima cemisenniw ka foro-kono-baaraw nafa bilali u ka kalanko ta неfe.

#### Лонон kunnafonisraw

- Walasa baara sifileta in be ne sorc, a kafisa an k'a don folo kunnafonisira minnu be Лонон. O folo ye kubeda-kono-arajoso ye min be wele ko cesiri arajoso. Ale joyoro ka bon kosebe, nka finennin min b'a la, o de y'a ka jemukan sebali ye Лонон kubeda maradugu bee kono. Kunnafonisira filananw ye kunnafonisew ye, Jekabaara; Sahelianikibaru. Olube kalankosebe Лонон dugu caman kono, nka

balikukan ka нонгирли dugu caman kono, o y'u fana joyoro ke to-ka-je ye.

Логоналонбо-јекулу дo fana be Лонон anidонкилдала dawulama caman wer. Olu lamennen don kosebe, nka diine banban ko jugu dugu caman kono, o be ke sababu ye k'olu fana joyoro barika fegenya doonin. Orsa, walasa kunnafoni kana ke to-ka-jeften ye, ne fili be ke ka nesin duguw-kono-maa lamennenw ma an'u kono-maa-kotigiw: dugutigiw ; diinetigiw; ton немогов; furakelikelaw; domaw ni тонтигивани balikukalankaramогов, ni тинминемусование ма caman werew.

Nka kunnafonisira ni maa-hakili-lamin-maa ninnu lakodonnit'a dan ye. Wajibi don u ka ногона-dafasiraw ka pereperelatige temensira dantigelen kono u kelen-kelen bee ye. Логоналајеба in ka baara бenna o de ma tile duuru kono;

#### Логоналаје кене-кан-могов

Лонон ногоналаје кене in kan, maa mugan ногона de tun be yen; min bora:

- Denmisew ka kalanko setigiblon maa 5
- Segu mara kalanko лемогосо maa 1



*Yaho Ahadi (Unesco togolamogo) ani Musa Dunbiya (dugumakalanko setigida togolamogo), olu de tun ye laje in nemogow ye*

- Lōnōn kalanko nemogoso maa 1
- Lōnōn karamogo kalanso maa 1
- Segu kalanden-masa-ton maa 1
- Mali kunnafoni jenseñ setigiblon maa 1
- Balikukalan baarada maa 2

- Ja-dilan-baarada (CESIPA) maa 1
  - Jekabaara kunnafonisēben maa 1
  - Saheli kunnafonisēben maa 1
  - "UNESCO" jekulu maa 1
  - Lōnōn arajoso (Cesiri) maa 2
- Ka fara laje kotigi maa 2 kan.

Baara sifiletaw lawaleyali baaraw kojé bée lajelen kotigya bée denmisénw ka setigiblon mögo min bolo, o y'an balimake Musa Dunbiya ye. "UNESCO" yere ka kōlosilikébaa min béebaarabolo in kōlēmaaya la (jamana duuru bée dakun na), o y'an balimake Yaho Ahadi ye.

Lōgōnlaje inganatigera denmisénw ka kalankō setigiblon maaba dō fē, min y'an balimake Ibrahim Kampo ye. A baaraw kuncera jumadon, Okutoburukalo tile 28. Lōnōn kubedakuntigi tun b'o kene kan.

Ben ker'a kan ko sifile baarabolo in bēna kiimē kalo danmado, baaraw damineni kofe. An bée bē Ala deli sa o kiimēni ka ke kunnawoloko y'an bée lajelen bolo, ka masoro, n'a taara nēfē, Mali jamana duguba wēre caman fana bēna bō a nunma, i n'a fō an balimake Yaho Ahadi y'a fō cogo min.

Tumani Yalam Sidibe

## Ka bō Fajobugu

Nin ye sēben ye k'a ci Jekabaara baarakalaw ma. Kunnafoni min bē cikebugula mögōw ka foroko n'u ka sanjukow kan, o ye fēn ye min nafa tē se ka ban fō la. Sanjiko ani foroko kunnafoni Fajobugu.

Ne y'a damine Zuwenkalo la. Zuwenkalo la, sanji ye nako 12 ke mm 189,1.

Zuluyekalo la nako 15, mm 254,4

Utikalo, nako 16 mm 259,2

Setanburukalo nako 11, mm 187,8

Nin kalo 4 in kōnōsanji ye nako 54 ke mm 890,5 nin y'anw ka sanji nacogo ye yan.

Nka foli bē Sibiri Jara ye, a bē tiripoli Liibi jamana kan, ka Baba Samake fo, oye kalanden ye Fajobugu ani ka Sedu Bagayoko fo o ye cikela ye Keleya kafo la, ani Jekabaara ni arajo Mali baarakelaw bée lajelen.

Nin y'anw ka dugu sanjikokunnafoni ye Jamayiri ke fē k'a ci Jekabaara baarakelawn'a kalanbagawbē lajelen ma.

Fajobugu Jitumu kalanden dō ka bataki - Welesebugu

## An ka yele doonin

- Nin ce in tun ka siran bonyara f'a siginogōnw b'a da nzana na. Don dō, k'a n'a muso dalen to sufē, nson nana soda kari k'a b'u da la.


Tuma min ni nson y'a sagonafēnw tali damine bōn kōnō, ce muso y'a kōrō k'a dōgōdōgōn in fō a tulo kōrō ko nson donn'u kan. Ce ma sēge dan ka k'a muso la. Muso y'a kōrin fo ka nson tila a ka baara la, hali a ma sogo-sogo. Tuma min ni nson bōra n'a sagonna minēnw ye ka se dukēnē na, ce wulila ka n'i k'i kanto a muso ma ko: Ala bē nsonke in fē halisa, a kunnā ka di, n'a tun bolo sera ne fa togoman ka mōnimugu ma dogodogo la bi, a tun b'a dōn su in na ko ne fana ye kamalenkōrōba de ye!

- Ninkamalen in jarabirā a kōrōkē muso la. O jarabi danmatemēnko jugu, kamalen in kōrōkē ko goyara a ye f'a bē ko jugu danma naniya n'o ye.

Ala ka sebagaya kōnō, bana sugu dō cunna kōrōkē kan don do su fē. Sogomada fē, degün bonya ko jugu, kōrōkē kirinna. O yōrō bē a dōgōkē k'a sara. Tuma min mögōw ye kōrōkē ta k'u bē taa a su ko nēgen kōnō, a y'a lamaga atabagaw bolo. Dōgōkē nē da o kan, a y'i kanto jama ma ko: Aw kan'a to a ka kuma dē, kabi a ma sa a da ka gelen. A ye taa n'a ye, a sara a menna!

Bakari Sangare

# Cikelaw n'u fanga!



*Cikelaw ka kow t'e tulonko ye fantan ni fama si bolo Mali kono.  
Yali u yerew b'o don wa?*

Otiwale cikelawka donwnejenf (Jekabaara ka kosafe boko), Sikowu nemaaba, n'o y'an balimaké zanga Antuwani Berte ye, oye kuma do fo a ka jemukan kono, min ma temen mogó si tulo kan. Aw bee b'a don ko Sikowu ye cikelaw lafasa-jekuluba de ye. Jeñogon zanga Antuwani Berte ko : "Cikelaw ye fangaba de ye, nk'u yere t'o kalama"! N hakili la, nin be hakilijagaboko bø. N'an yejateminé ke Maliko bunaadamen hake mogó miliyon tan ni kóla, an b'a ye ko cikelaw ni kungo-kono-mogó tów y'o hake o fanba ye. Awa, Mali ka soro fanba fana dulonnen b'olu de wóssi jila. Nk'o n'a ta bee, cikelaw kelen k'u yere ke bolokofemogow ye. N'i y'u mankan men waati o waati, i b'a soro n'u ts k'a fo ko do farala tubabunogow songo kan i b'a soro u b'a fo ko do farala cikeminew songo kan. Walima u b'a fo kò koori songo binna. O te baasi ye barisa baara kun ye a tono soroli ye. Nka cikelaw be sekako wéreñini ka fara uhaminanko fólen ninnu kan. Cogodi u be se k'u yere nafa; k'u ka sigida nafa ani ka jamana nafa. O siratege yere la, wale caman kera cikelaw fe. Misaliw la an da be se ka se Ngolobugu, Nankorola ani Namabuguni Sugulakawka walew ma.

Olu n'u njogonna caman wérew. Nka waleba be ko. Ne hakili la, cikelaw ka jetónw ka kan ka ke izini (dabalida) misenninw bonanw ye bi. Aw k'a file, Yanfoylayemangoro fasoye anijiriden wérew, an be se ka minnu bayelema an yere nagakoro. Koori soro hake be ka yiriwa ka t'a fe san o san. MAKOCI b'u san. O ye hérèko ye ka masoro an be wariba telinsoro ola. Nka, yalinibaarada misenninw fana b'an senkoro an ka gesedalaw be njogon kafoycrominu na walasa ka an ka "bolokorokooriinw" da k'u k'an ka ladafafini ce niñw ye. O be di? O ye ko barikama ye ka d'a kan, Mali te nafolo-nini-jamana gansan ye, nka Mali ye danbetigi jamanaba fana ye. N'i dun y'a men ko danbe, o be sinsin yerefen de kan. Tine don, gesedalaw conconnen don an ka jamana fan bee fe. Nk'o n'u ka baara jekuluw sigili sen kan, o te kelen ye. An b'a don ko duguyiriwatón caman kono bi, lakolisow ni kalansow ni dogotorcsow ani yiriwa baarada caman wéreñigilen be sen kan cikelaw fe. O ye daamu ye an yerew ma an'an faso Maliba in ma. Nka dugu keme yirika joli de fana be yenminnum'oyeredemenbaara faamu? Fasoden numanya dun te doweré ye

yereñemén ni fasodemen ko. An be se ka misali ta, Jekabaara kafo mara duguw ka tungarankew ka walew kan. U be lakolisow ni madarasow ani balikukalansow jo fan bee fe. Dogotorcsowni muso-lajiginsowanisiso humanwbeyore bee. Oye tungarankew joroyoro ye. A ka kan anw minnu fana b'an makonénafolo soro yan, anw fana k'an jeniyoro fin an ka sigidaw layiriwali la. An be se k'o ke n'an ka duguw lasorcsiraw labenni ye sannifeere nekorowaatiw la. O be mobiliw ka taka-seginw nogoya, baara be telliya awa an ka duguw togo be diya. Ni dugu kelen-kelen bee y'a faamu koadamaden bee ka "faso sonfen" de ka kan ka caya n'a ka "sorofen" ye faso la, o don de an b'a foko:haate, Malibilara bonogolasira kan sisán! N'an ka dugu kelen-kelen bee y'a faamu don min ko "njetaa" te fen numannin burunnen ye a tigi ko i be girin ka min tomon, ko nka yere-yiriwa karabata de don i farikolo n'i hakili be segen min nofe, o don de an be se k'a fo ko : haali Mali ka yiriwa te waati janko ye belen! Ni don min na an ka duguw n'u konomogow bee y'a faamu ko koro ka demen ni dçgo ka demen be dili don yere ka demen de turudingé kono, o don de an be se k'a fo ko Maliko bora tulonko la! N'an ka duguw n'u konomogow dun ye nin faamuyali bøs lawaleya sira ta, o don an b'a fo ko Maliba cikelaw bor'u yere ka fanga kalama. Sanni o don jan-don-surun ce, a ka kan an ka foli ni dugawudon ke njogonye san kalo laban in na, walasa an be 1995 san kura damine ni hakili human ye an ka baara ketaw an'an ka sigijogonsiraw, n'an ka adamadenyasilaw bee kan. Ala ka san kura k'an ka daamus an'an ka here soro san ye. Ala ka hine taabaw la. Ala ka si jan ani kenevaya d'an yerew ma.

An ka foli be bataki cibaaw bee ma Jekabaara togo la. Minnu ka bataki bora Jekabaara kono ani minnu ta be boli makononi na a kono. An hakili la, 1995 san bøna ke jekabaara kalanbagaw ka bataki cita cayali san ye an ma. Ala ka here sabati.

Tumani Yalam Sidibe

# Mali ntolatanko sannayelen na

A kelen be i ko ni kura de fiyelen be Malintolatan bilama kan kunu a tun te doweré ye bolokofe fen gansan ko, dusukasi ni jigiwaaro bonya koson. Bi, hali n'a kebagaw ma janaya, u tɔrɔmɔnɔ be somogɔ sama bo haali, ni tali kera an ka tɔnw ka kɔsafe ntolatan kelenw lahalia la. Mali jamana kɔkan kupuwn'a kɔntawjanajew senfe, an ka ntolatan kanubagawta kera daamu ni wasa dan ye. O wasa folo bɔra kulukɔromara ntolatanton jananyɔro, bawo ale ye Mali kupujana tanko 34 nan nɔgɔnkunben laban kene lasɔro ninan. O ye wale ye, min tun ma deli ka k'u fe folo. Kuru 2 ni o Esitadi ntolatanton cedenw y'o k'u la nɔgon kunbe in senfe ntolatan jijalenba kofe min kuntaala janya balara ntolatan kanubaga caman na, bawo bee tun jonna janan cedenw na. Ladala ntolatan sanga 90 forilen ko falaki kan, Esitadi ntolatanton ni janan ntolatanton cedenw y'a saran cebɔ-nɔgon ntolatan sanga 30 fana kɔno. O waati de la Esitadi cedenw sera k'u walanka kab'uyere la nikuru 2 kerunni ye u ka celu kɔno.

Wasa filanan ye samatasegew, ka farafinna 1996 san kupuba nɔbila ntolatanw kun folo daminecɔgo ye. Mozanbi jamana ntolatanton dasilen ko u. fe, kuru 2 ni o, Samata segew sɔro la k'a jira kokura Lagine jamana ntolatanton ceden Titi Kamara n'a tɔnjɔgonw na k'u tɔrɔmɔnɔ be somogɔ sama bo hali tinizi taa ko fe.

"An ka doço nka an te Cɔnyi !" samatasegewy'odakurujuñedanmado lawaleya nikuru fila kerunniye Lagine jamana ntolatanton Cedenw ka celu kɔno.

Titi Kamara n'a tɔnjɔgonw ka kɔsafe galabukene ya tɔn dan kera Mali ntolatan kanubagaw ja tigeli ye.

"Den be bin a tabaga de bolo" siga t'ola wa don bee fana te karidon ye. Samatasegé kamanwma yerekecogo



sɔro Namibi jamana kɔno. O ntolatanton cedenw y'u dɔrɔ kuru 2 ni kelen. O temennen ko, samatasegew ni Angola jamana cedenw ka nɔgon kunben tun be nini ka ke jege kolo ye kabalanu kanubagawtannan ntolatan jijalenba ko fe ka d'a kan, Lagine jamana cedenw tun y'u foroki yanni u n'anw ka ben.

Ala barika la, jatige bonyara nikasara ye. nɔgɔnkunben kuncera kuru 0-0 kan.

Farafinna 1996 san Kupuba nɔbila ntolatanw tanko folokadara kɔno, Mali samatasegew ye kulu 6 nan nɔmɔgo ya ta ni kuru 5 ye Lagine Jamana ntolatanton dalen b'ale kan ni kuru 4 ye. Ko "Kami b'a nɔmɔgo de ton file" bamananw ko ten. An ka wasa sabanan bɔr'o ntalen kɔro faamuyali la

Samatasegencinuw fe.

Farafinna 1995 san ntolatanton ncinuw ka kupuba nɔbila ntolatanw kadara kɔno, an ka samatasegen cininwy'uminniji sigi Nizeriya jamana faaba kɔno (gintantobetaa laban yen 1995 san kɔno) walasa o ka walasa o ka waleya, u ye tinizi jamana ni Gana jamana ntolatantonmankan cedenw furan ka bo sira la.

Kunnafoni sirategela, a nɔgɔnkunben

fila bee labanna ta-ka-kunu ntola kerun kuntaalajan na - min jatige bonyara kosebe.

Komi Bamananw ko ko musokɔrodɔn min kuntaala ye tile saba, ko mɔgɔ kan'a bakɔronin taanu o tile folo la" n'to tun te nin wasaw koson ne tun be son ka nbakɔronin...

Ala k'an ni sababa ben halisa gintan nataw kadara kɔno.

Bakari Sangare.

## JEKABAARA SEBENNEKULU

Laboli kuntigi

Salif Berte

Sebennekulukuntigi

Tumani Yalam Sidibe

Sebennekulu mɔgɔw

Tumani Yalam Sidibe,

Salif Berte

Bakari Sangare

ani Solomani Jalo

Sebenyɔro ɔrodinateri la

Jamana gafe sebenyɔro

Baarakenɔgonw

MAKOCI, "OCED", "SNV"

Jensenyɔro

MAKOCI, "ODIK", "OTIWALE", "ODIMO"

Labugunyɔro : Kibaru

Bɔnogɔnko hake : 11 000